

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E

**o koncentraciju privrednog subjekta «Wietersdorfer Baustoffe Beteiligungs GmbH»
Austrija i «House Milos» export-import d.o.o. Pližna, Bosna i Hercegovina**

Sarajevo
Februar, 2008. godine



Broj: 01-05-26-023-11-II/07
Sarajevo, 19.02.2008. godine

Na osnovu člana 25. stav (1) tačka e), člana 42. stav (1) tačka d) i člana 43. stav (2), a u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05 i 76/07), a po zajedničkoj Prijavi namjere koncentracije privrednog subjekta «Wietersdorfer Baustoffe Beteiligungs GmbH» Ferdinand Jergitsch Strasse 15, 9020 Klagenfurt, Republika Austrija i «House Milos» export-import d.o.o. Rakovička cesta broj 89, Ilidža, Bosna i Hercegovina, podnesenoj od ovlaštenog zastupnika, zajedničke advokatske kancelarije Bojane Tkalčić-Đulić, Olodar Prebanić i Adela Draganović, Alipašina broj 51, 71000 Sarajevo, zaprimljenoj dana 15.06.2007. godine pod brojem: 01-01-26-021-II/07, Konkurencijsko vijeće, na 61. (šezdesetprvoj) sjednici održanoj dana 19.02.2008. godine, je donijelo

R J E Š E N J E

1. Ocjenjuje se dopuštenom koncentracija na tržištu proizvoda građevinskog materijala: mašinskih maltera i ljepila u Bosni i Hercegovini, koja će nastati na osnovu zajedničkog ulaganja na dugoročnoj osnovi nezavisnih privrednih subjekata «Wietersdorfer Baustoffe Beteiligungs GmbH» Austrija i «House Milos» export-import d.o.o. Ilidža, Bosna i Hercegovina, osnivanjem privrednog subjekta «W&P Milos» društva sa ograničenom odgovornošću, Sarajevo.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 13.07.2007.godine, pod brojem 01-05-26-023-II/07 zaprimilo zajedničku Prijavu namjere koncentracije u smislu člana 16. stav (1) Zakona o konkurenciji (u daljem tekstu: *Prijava*), privrednog subjekta «Wietersdorfer Baustoffe Beteiligungs GmbH» Ferdinand Jergitsch Strasse 15, 9020 Klagenfurt, Republika Austrija i «House Milos» export-import d.o.o., Rakovička cesta broj 89, Ilidža, Bosna i Hercegovina, podnesenoj od strane ovlaštenog zastupnika, zajedničke advokatske kancelarije Bojane Tkalčić-Đulić, Olodar Prebanić i Adela Draganović, Alipašina broj 51, 71000 Sarajevo (u daljem tekstu: *Podnosilac prijave*).

Nakon uvida u dostavljenu Prijavu Konkurencijsko vijeće je utvrdilo da ista nije kompletna u smislu člana 30. Zakona o konkurenciji (u daljem tekstu: *Zakon*) i Odluke o načinu podnošenja prijave i kriterijumima za ocjenu koncentracija privrednih subjekata («Službeni glasnik BiH», broj 95/06), te je u skladu sa članom 31. Zakona zatražilo dopunu dana 14.09.2007.god. Podnosilac prijave je Konkurencijskom vijeću dostavio dio dokumentacije dana 25.09.2007.

godine, dopisom broj: 01-05-26-023-2-II/07, te su podnosiocu prijave upućeni ponovni zahtjevi za dopunu dana 04.10.2007. godine i 25.10.2007. godine.

Nakon što je Podnosilac prijave dana 16.10.2007. godine uz dopis broj:01-05-26-023-4-II/07 dostavio dio tražene dokumentacije, dopisom broj: 01-05-26-023-6-II/07 od 02.11.2007. godine od Konkurencijskog vijeća je zatražio produženje roka za dostavu preostale dokumentacije u skladu s članom 31. stav (2) Zakona.

Uz dopise broj 01-05-26-023-7-II/07 od 16.11.2007. godine i broj 01-05-26-023-8-II/07 od 20.11.2007. godine Podnosilac prijave je dostavio preostalu potrebnu dokumentaciju, na osnovu čega je Konkurencijsko vijeće Podnosiocu prijave dana 24.12.2007. godine, izdalo Potvrdu broj: 01-05-26-023-9-II/07 o prijemu kompletne i uredne Prijave, u smislu člana 30. stav (3) Zakona.

Podnosilac prijave navodi da ne namjerava podnijeti zahtjev za ocjenu predmetne koncentracije nekom drugom tijelu ovlaštenom za ocjenu koncentracije izvan teritorija Bosne i Hercegovine, u smislu člana 30. stav (2) Zakona.

Konkurencijsko vijeće u postupku ocjene predmetne koncentracije je utvrdilo sljedeće činjenice:

Konkurencijsko vijeće je utvrdilo da je Prijava podnesena u skladu sa zakonom propisanim rokom, u smislu člana 16. stav (1) Zakona.

1. Učesnici koncentracije

Učesnici koncentracije su privredni subjekt «Wietersdorfer Baustoffe Beteiligungs GmbH» Ferdinand Jergitsch Strasse 15, 9020 Klagenfurt, Republika Austrija i «House Milos» export-import d.o.o. Rakovička cesta broj 89, Ilidža, 71000 Sarajevo, Bosna i Hercegovina.

1.1. Privredni subjekt «Wietersdorfer Baustoffe Beteiligungs GmbH»

Privredni subjekt «Wietersdorfer Baustoffe Beteiligungs GmbH», Ferdinand Jergitsch Strasse 15, 9020 Klagenfurt, Republika Austrija, (u daljem tekstu: WBB) je upisan u registar pravnih lica u Klagenfurtu pod brojem: FN 288433 t, dana 17.01.2007. godine u skladu sa zakonima Republike Austrije.

Prema podacima Podnosioca prijave, većinski vlasnik (75,0 % vlasnik) privrednog subjekta WBB je privredno subjekt «Wietersdorfer Industrie Beteiligungs GmbH», Klagenfurt, Republika Austrija (u daljem tekstu: WIB), a preostalih 25,0% kapitala je u vlasništvu privrednog subjekta «Intercement» d.o.o. Ljubljana, Republika Slovenija.

Registrovana djelatnosti privrednog subjekta WBB je građevinarstvo, preuzimanje, upravljanja i finansiranje drugih društava.

1.1.1. Povezani privredni subjekti

Privredni subjekt WBB u Bosni i Hercegovini je 100,0 % vlasnik privrednog subjekta «Baumit» d.o.o. Sarajevo, čija je glavna djelatnost - trgovina građevinskim materijalom: mašinskim malterima i ljepilom.

Prema podacima iz Prijave privredni subjekt WBB neposredno nema vlasničke udjele u drugim privrednim subjektima u Bosni i Hercegovini.

1.2. Privredni subjekt «House Milos» export-import d.o.o.

Privredni subjekt «House Milos» je upisan u sudski registar pod brojem: 1-5723 u Opštinskom sudu u Sarajevu dana 06.02.2002. godine. Osnivači i vlasnici društva su: Milos Franjo (Trg Nezavisnosti, 71000 Sarajevo) sa vlasničkim udjelom od 51,0%, Milos Danijel (Rakovička cesta 389, 71000 Sarajevo) od 25,0% i mldb. Milos Davor (Rakovička cesta 389, Iliđa, 71000 Sarajevo) od 24,0%.

Osnovna djelatnost privrednog subjekta «House Milos» je eksploatacija dolomita, proizvodnja cigle, cementa, kreča, gipsa, maltera i ostalih proizvoda od betona.

1.2.1. Povezani privredni subjekti

Privredni subjekt «House Milos» u Bosni i Hercegovini 100,0 % je vlasnik subsidijarnog društva «RR-Company» Kreševo, čija je glavna djelatnost- eksploatacija dolomita.

Prema podacima iz Prijave privredni subjekt «House Milos» neposredno nema vlasničke udjele u drugim privrednim subjektima u Bosni i Hercegovini.

2. Ukupan prihod učesnika predmetne koncentracije

U smislu odredbe člana 14. stav (1) tačka b) Zakona, obaveza prijave namjere koncentracije privrednih subjekata postoji ako su učesnici koncentracije ostvarili Zakonom predviđeni ukupni godišnji prihod ostvaren prodajom roba i /ili usluga na svjetskom tržištu preko 100 miliona KM po završnom računu u godini koja je prethodila koncentraciji, pri čemu je najmanje jedan učesnik koncentracije registrovan na teritoriji Bosne i Hercegovine.

S obzirom da privredni subjekat WBB nije ostvario prihode u 2006. godini (osnovan je 17.01.2007. godine), uzet je u obzir ukupni prihod njegovog većinskog vlasnika, privrednog subjekta «Wietersdorfer Industrie Beteiligungs GmbH», Klagenfurt, Republika Austrija (WIB).

Učesnici predmetne koncentracije su ostvarili ukupan prihod na dan 31. decembra 2006. godine i isti je:

Tabela 1.

Naziv privrednog subjekta	Ukupno prihod na svjetskom tržištu u KM	Ukupno prihod u Bosni i Hercegovini u KM
1. WBB	¹ (..)**	(..)**
2. WIB	(..)**	(..)**
3. House Milos	(..)**	(..)**

* korišteni su podaci iz Prijave

Prema podacima (Tabele 1.) proizilazi da ukupni prihodi privrednih subjekata učesnika predmetne koncentracije iznose preko 100.000.000,00 KM na svjetskom tržištu po završnom računu u godini koja je prethodila koncentraciji, te je ispunjen uslov obaveze prijave namjere koncentracije, u smislu člana 14. stav (1) tačka a) Zakona.

¹ (..)** podaci predstavljaju poslovnu tajnu

3. Pravni okvir ocjene koncentracije

Konkurencijsko vijeće u provedbi postupka ocjene dopuštenosti predmetne koncentracije primjenilo je odredbe Zakona i Odluke o utvrđivanju relevantnog tržišta («Službeni glasnik BiH», broj 18/06) te Odluke o načinu podnošenja prijave i kriterijima za ocjenu koncentracija privrednih subjekata.

Konkurencijsko vijeće je, na osnovu člana 43. stav (7) Zakona, koristilo sudsku praksu Evropskog suda i odluke Evropske komisije, kao i kriterije i standarde iz Uredbe Vijeća EK broj 139/2004 o kontroli koncentracije između privrednih subjekata, Obavijest Evropske Komisije o konceptu koncentracije privrednih subjekata i Smjerenice za ocjenu vertikalnih koncentracija.

4. Pravni osnov i oblik koncentracije

Pravni osnov predmetne koncentracije je Ugovor o osnivanju društva sa ograničenom odgovornošću pod nazivom «W&P Milos» d.o.o. Sarajevo (u daljem tekstu: Ugovor), zaključen dana 05.07.2007. godine između privrednog subjekta Wietersdorfer Baustoffe Beteiligungs GmbH, Republika Austrija i «House Milos» export-import d.o.o. Ilidža, Bosna i Hercegovina.

Prema predmetnom Ugovoru osnovni kapital društva iznosi 10.000 KM od čega privredni subjekt «WBB», ulaže 9.000,00 KM i stiče 90,0 % vlasničkog udjela u privrednom subjektu W&P Milos» d.o.o. Sarajevo, dok privredni subjekt House Milos» export-import d.o.o. Ilidža, Bosna i Hercegovina ulaže 1.000,00 KM i stiče 10,0 % vlasničkog udjela.

Nadalje, prema odredbama predmetnoga Ugovora privredni subjekt House Milos» export-import d.o.o. Ilidža, Bosna i Hercegovina će izvršiti procjenu (procjena zvaničnog vještaka) zemljišta, čija procjenjena vrijednost će predstavljati iznos od 10,0 % vlasničkog udjela u novosnovanom društvu, a privredni subjekat «WBB» će izvršiti odgovarajuću uplatu u novcu u iznosu, koji će obezbjediti zadržavanje vlasničkog udjela od 90,0%.

Ovim Ugovorom «WBB» se obavezao da će, gore navedenim dodatnim ulaganjima u novcu u novoosnovano društvo «W&P Milos», izvršiti izgradnju fabrike za proizvodnju maltera i ljepila u vrijednosti od cca. 14 miliona KM.

Pravni oblik predmetne koncentracije u skladu sa članom 12. stav (1) tačla (c) Zakona je zajedničko ulaganje na dugoročnoj osnovi dva nezavisna privredna subjekta, koji djeluju kao nezavisni privredni subjekti što u predmetnoj Prijavi predstavlja osnivanje novog nezavisnog društva sa ograničenom odgovornošću pod nazivom «W&P Milos» d.o.o. Sarajevo.

5. Analiza relevantnog tržišta

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda/usluga koji su predmet obavljanja djelatnosti na određenom geografskom tržištu.

Relevantno tržište proizvoda u predmetnoj koncentraciji čini tržište proizvoda građevinskog materijala: mašinskog maltera i ljepila.

S obzirom da su oba učesnika koncentracije prisutna na tržištu Bosne i Hercegovine direktno i indirektno preko subsidiarnih društava, za relevantno geografsko tržište smatra se područje cijele Bosne i Hercegovine.

S toga je Konkurencijsko vijeće kao relevantno tržište predmetne koncentracije utvrdilo tržište proizvoda građevinskog materijala: mašinskog maltera i ljepila na cijelom području Bosne i Hercegovine.

Tržišni udio učesnika koncentracije (prikazano na osnovu tržišnog udjela supsidijarnog društva «Baumit» d.o.o. Sarajevo, čija je pretežna djelatnost trgovina mašinskim malterima i ljepilom uglavnom iz uvoza) i njegovih najznačajnijih konkurenata, na relevantnom tržištu (tržištu mašinskog maltera i ljepila) na cijelom području Bosne i Hercegovine su:

Tabela 2.

	Rofix (%)	Stamal (%)	Baumit (%)	Ostali (%)	Ukupno (%)
Malter	40,0	35,0	12,0	13,0	100,0
Ljepilo	35,0	15,0	35,0	15,0	100,0

* korišteni su podaci iz Prijave

Na osnovu podataka (Tabele 2.) na relevantnom tržištu u Bosni i Hercegovini postoje dva domaća proizvođača, sa značajnijim tržišnim udjelom, građevinskog materijala: mašinskog maltera i ljepila i to: «Rofix» Ljubuški i «Stamal» Kreševo.

Tržišni udio supsidijarnog društva učesnika koncentracije na relevantnom tržištu iznosi 12,0 % za malter i 35 % za ljepilo.

Analiza dostavljena uz predmetnu Prijavu, predviđa u narednih pet godina u Bosni i Hercegovini rast potražnje za ovim proizvodima za cca 10,0-15,0 % godišnje, što bi u 2012. godini iznosilo cca 300.000 tona, te da navedeni domaći proizvođači ne mogu pokriti potražnju za ovim proizvodima u Bosni i Hercegovini, koja trenutno iznosi cca 180.000 tona.

Planirana proizvodnja novoosnovanog privrednog društva «W&P Milos» d.o.o. Sarajevo u narednih pet godina i predviđena potražnja za ovim proizvodima u Bosni i Hercegovini iznositi će:

Tabela 3.

	2008.	2009	2010.	2011.	2012.
Mašin.malter	15.000 t	18.350 t	23.200 t	28.400 t	33.000 t
Ljepilo	24.000 t	27.000 t	28.200 t	32.900 t	34.700 t
Ukupno	39.000 t	45.350 t	51.400 t	61.300 t	67.700 t
Predviđena potražnja u Bosni i Hercegovini	200.000 t	220.000 t	245.000 t	270.000 t	300.000 t

* korišteni su podaci iz Prijave

Prema podacima iz Prijave, Konkurencijsko vijeće je utvrdilo da planirani maksimalni proizvodni kapacitet novoosnovanog privrednog subjekta «W&P Milos» d.o.o. Sarajevo, za mašinski malter i ljepilo, iznosi cca 100.000 tona. Podaci (Tabela3.) pokazuje da se planirani tržišni udio ovog privrednog subjekta na relevantnom tržištu u narednih pet godina, a u odnosu na predviđenu potražnju kreće u rasponu od 7,5 – 11,0 % za mašinski malter i cca 12,0% za ljepilo.

Relevantni proizvodi privrednog subjekta «W&P Milos» d.o.o. Sarajevo će biti na tržištu Bosne i Hercegovine, te tržištima Republike Austrije, Republike Hrvatske, Republike Srbije, Republike Makedonije itd.

Analizom podataka dostavljenih uz Prijavu, Konkurencijsko vijeće je utvrdilo da je planirani zajednički tržišni udjel učesnika koncentracije na relevantnom tržištu u narednih pet godina, manji od tržišnog udjela od 60,0%, koji pretpostavlja da dva privredna subjekta mogu imati dominantan položaj na relevantnom tržištu, u smislu člana 9. stav (3) Zakona.

6. Ocjena predmetne koncentracije

Konkurencijsko vijeće je nakon procjene i analize podataka i činjenica u postupku donošenja predmetnog Rješenja, u smislu člana 17. Zakona, utvrdilo da koncentracija predmetnih privrednih subjekata neće značajnije promijeniti tržišne udjela učesnika koncentracije na relevantnom tržištu proizvoda građevinskog materijala: mašinskih maltera i ljepila u Bosni i Hercegovini.

Predmetnom koncentracijom će povećati broj učesnika na tržištu, čime bi se trebala pojačati konkurencija na relevantnom tržištu u Bosni i Hercegovini, te poboljšati snabdijevanje tržišta relevantnim proizvodima, što može dovesti i do snižavanja cijena istih.

Uzimajući u obzir sve iznesene činjenice i podatke koji su prethodili donošenju odluke, Konkurencijsko vijeće je ocijenilo da predmetna koncentracija ne sprečava, ograničava niti narušava tržišnu konkurenciju te se ista smatra dopuštenom, u smislu člana 18. stav (2) tačka a) Zakona, kao što je odlučeno u dispozitivu ovog Rješenja.

7. Administrativna taksa

Podnosilac Prijave na ovo Rješenje, u skladu sa članom 2. stav (1) tarifni broj 107. tačka d) 1) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06) je dužan platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

8. Pouka o pravnom lijeku

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednik

Sanja Božić